

四庫全書

史部

欽定四庫全書

明史卷十七

大學士張廷玉等奉 勅修

本紀第十七

世宗一

世宗欽天履道英毅神聖宣文廣武洪仁大孝肅皇帝
諱厚燾憲宗孫也父興獻王祐杭國安陸正德十四年
薨帝年十有三以世子理國事十六年三月辛酉未除

服持命襲封丙寅武宗崩無嗣慈壽皇太后與大學士
楊廷和定策遣大學士梁儲定國公徐光祚駙馬都尉
崔元禮部尚書毛澄太監谷大用韋彬張錦以遺詔迎
王於興邸夏四月癸未發安陸癸卯至京師止於郊外
禮官具儀請如皇太子即位禮王顧長史袁宗臯曰遺
詔以我嗣皇帝位非皇子也大學士楊廷和等請如禮
臣所具儀由東安門入居文華殿擇日登極不允會皇
太后趣羣臣上箋勸進乃即郊外受箋是日日中入自

大明門遣官告宗廟社稷謁大行皇帝几筵朝皇太后
出御奉天殿即皇帝位以明年為嘉靖元年大赦天下
卹錄正德中言事罪廢諸臣賜天下明年田租之半自
正德十五年以前逋賦盡免之丙午遣使奉迎母妃蔣
氏召賈宏復入閣戊申命禮臣集議興獻王封號九月
乙卯罷大理銀礦丙辰梁儲致仕壬戌以吏部侍郎袁
宗皋為禮部尚書兼文淵閣大學士預機務壬申錢寧
伏誅六月戊子江彬伏誅乙未縱內苑禽獸令天下毋

得進獻丁酉革錦衣衛冒濫軍校三萬餘人戊戌振江西災壬寅革傳陞官癸卯振遼東饑秋七月壬子進士張璉言繼統不繼嗣請尊崇所生立興獻王廟於京師初禮臣議考孝宗改稱興獻王皇叔父援宋程頤議濮王禮以進不允至是下璉奏命廷臣集議楊廷和等抗疏力爭皆不聽癸丑命自今親喪不得奪情著為令丁巳小王子犯莊浪指揮劉爵禦却之丙子革錦衣衛所及監局寺廠司庫旗校軍士匠役投充新設者凡十四

萬八千餘人丁丑寧津盜起德平知縣龔諒死之九月
乙卯表宗臯卒庚午葬毅皇帝於康陵冬十月己卯朔
追尊父興獻王為興獻帝祖母憲宗貴妃邵氏為皇太
后母妃為興獻后壬午興獻后至自安陸十一月庚戌
振江西災丁巳錄平宸濠功封王守仁新建伯甲戌乾
清宮成罷廣西貢香諭各鎮巡守備官凡額外之征悉
罷之

嘉靖元年春正月癸丑享太廟己未大祀天地於南郊

清寧宮後殿災命稱孝宗皇考慈壽皇太后聖母興獻
帝后為本生父母己巳甘州兵亂殺巡撫都御史許銘
二月己卯耕藉田三月辛亥佛持衛獻生豹却之甲寅
釋奠於先師孔子丁巳上慈壽皇太后尊號曰昭聖慈
壽皇太后武宗皇后曰莊肅皇后戊午上皇太后尊號
曰壽安皇太后興獻后曰興國太后夏四月壬辰命各
邊巡按御史三年一閱軍馬器械秋七月己酉以南畿
浙江江西湖廣四川早詔撫按官講求荒政九月辛未

立皇后陳氏冬十月辛卯振南畿湖廣江西廣西災免
稅糧有差壬辰以災傷勅羣臣修省十一月庚申壽安
皇太后崩十二月戊寅振陝西被寇及山東礦賊流劫
者是年琉球入貢

二年春正月乙卯大祀天地於南郊丁卯小王子犯沙
河堡總兵官杭雄戰却之二月癸未振遼東饑壬辰總
督軍務右都御史俞諫總兵官魯綱討平河南山東賊
三月乙巳詣達寇大同甲寅武宗神主祔太廟戊午賜

姚淶等進士及第出身有差夏四月壬申以災異敕羣臣修省癸未以宋朱熹裔孫暨為五經博士癸巳命兩京三品以上及撫按官舉堪任守令者閏月始修醮宮中五月庚午小王子犯密雲石塘嶺殺指揮使殷隆六月癸丑以災傷免嘉靖元年天下稅糧之半秋八月辛酉小王子犯丁字堡都指揮王綱戰死冬十一月丁卯免南畿被災稅糧己丑振河南饑是年賽瑪爾堪吐魯番天方入貢

三年春正月朔寅朔而畿河南山東陝西同時地震丁丑大祀天地於南郊丙戌南京刑部主事桂萼請改稱孝宗曰皇伯考興獻帝曰皇考興國太后曰聖母下廷臣議是月朶顏入寇二月丙午楊廷和致仕庚戌南京地震三月壬申振淮揚饑辛巳振河南饑丙戌以席書為禮部尚書夏四月己酉上昭聖皇太后尊號曰昭聖康惠慈壽皇太后庚戌上興國太后尊號曰本生聖母章聖皇太后癸丑追尊興獻帝為本生皇考恭穆獻皇

帝大赦辛酉編修鄒守益請罷興獻帝稱考立廟下錦
衣衛獄五月乙丑蔣冕致仕修撰呂柟言大禮未正下
錦衣衛獄丁丑遣使迎獻皇帝神主於安陸己卯以吏
部尚書石琚兼文淵閣大學士預機務六月丙午以主
事桂萼張璁為翰林院學士方獻夫為侍講學士辛亥
御史段續陳相請正席書桂萼罪吏部員外郎薛蕙上
為人後解戊午鴻臚少卿胡侍言張璁等議禮之失俱
下獄秋七月乙亥更定章聖皇太后尊號去本生之稱

戊寅廷臣伏闕固爭下員外郎馬理等一百三十四人
錦衣衛獄癸未杖馬理等於廷死者十有六人甲申奉
安獻皇帝神主於觀德殿己丑毛紀致仕辛卯杖修撰
楊慎檢討王元正給事中劉濟安磐張漢卿張原御史
王時柯於廷原死慎等戍謫有差是月免南畿河南被
災稅糧八月癸巳大同兵變殺巡撫都御史張文錦乙
卯以吏部侍郎賈詠為禮部尚書原文淵閣大學士預
機務九月丙寅定稱孝宗為皇伯考昭聖皇太后為皇

伯母獻皇帝為皇考章聖皇太后為聖母丙子詔天下
丙戌吐魯番入寇圍肅州命兵部尚書金獻民總制軍
務署都督僉事杭雄充總兵官太監張忠提督軍務禦
之冬十一月己卯命戶部侍郎胡瓚提督宣大軍務都
督魯綱充總兵官討大同叛卒十二月壬子甘涼寇退
召金獻民還戊午起致仕大學士楊一清為兵部尚書
總制陝西三邊軍務是年琉球入貢魯默特貢獅子犀
牛

四年春正月丙寅西海布爾噶犯甘肅總兵官姜夔擊
敗之辛未大祀天地於南郊二月乙卯禁淹獄囚三月
甲戌命修獻皇帝實錄壬午仁壽宮災夏五月甲戌賜
廬州知府龍誥官秩詔天下倣誥備荒振濟法庚辰作
世廟祀獻皇帝八月戊子作仁壽宮是月田州指揮岑
猛叛詔都御史姚鏌討之冬十月丁亥作玉德殿景福
安喜二宮十二月辛丑大禮集議成頒示天下閏月乙
卯朔日有食之乙亥振遼東災是年天方入貢

五年春正月乙未大祀天地於南郊二月甲寅命道士
邵元節為真人庚辰免山西被災稅糧壬午振京師饑
三月辛丑賜龔用卿等進士及第出身有差丁未定有
司久任法夏五月庚子楊一清復入閣秋七月庚寅免
四川被災稅糧八月丙寅振湖廣饑九月己亥章聖皇
太后有事於世廟冬十月辛亥朔親享如太廟禮壬子
振南畿浙江災免稅糧物料庚午頒御製敬一箴於學
宮是年暹羅入貢

六年春正月癸未命羣臣陳民間利病己丑大祀天地
於南郊二月辛亥小王子犯宣府叅將王經戰死癸亥
費宏石琚致仕庚午召謝遷復入閣三月庚辰寇復犯
宣府叅將關山戰死甲午以禮部侍郎程鑾為吏部侍
郎兼翰林學士入閣預機務夏四月己巳免廣西被災
稅糧五月丁丑朔日有食之甲申詔起前禮部尚書羅
欽慎為吏部尚書辭不拜丁亥起前南京兵部尚書王
守仁以原官兼左都御史總制兩廣江西湖廣軍務討

田州叛蠻秋八月庚戌以議李福建獄下刑部尚書顏
頤壽左都御史聶賢大理寺卿潘沐等於錦衣衛獄侍
郎桂夢張聰少詹事方獻夫署三法司雜治之總制尚
書王憲擊敗小王子於石舊墩癸亥賈詠致仕庚午振
湖廣水災九月己卯免江西河南山西被災秋糧壬午
頒欽天大獄錄於天下冬十月戊申以兵部侍郎張聰
為禮部尚書兼文淵閣大學士預機務是年魯默特入
貢

七年春正月癸未考覈天下巡撫官丙戌大祀天地於
南郊三月戊寅謝遷致仕癸巳命右都御史伍文定為
兵部尚書提督軍務侍郎梁材督理糧儲討雲南叛蠻
夏四月甲寅甘露降告於郊廟六月辛丑明倫大典成
頒示天下癸卯定議禮諸臣罪追削楊廷和等籍丁卯
雲南蠻平秋七月己卯追尊孝惠皇太后為太皇太后
恭穆獻皇帝為恭睿淵仁寬穆純聖獻皇帝辛巳尊章
聖皇太后為章聖慈仁皇太后戊子詔天下八月壬子

免河南被災稅糧九月甲戌王守仁討廣西蠻悉平之
壬午振嘉興湖州災冬十月丁未皇后崩十一月丙午
吐魯番遣使求貢詔許之丙寅立順妃張氏為皇后十
二月丙子小王子犯大同指揮趙源戰死是年琉球入
貢

八年春正月己卯振山西災庚戌大祀天地於南郊二
月癸酉以吏部尚書桂萼兼武英殿大學士預機務丁
丑振襄陽饑甲申旱躬禱於南郊乙酉禱於社稷三月

丙申葬悼靈皇后戊戌振河南饑甲寅賜羅洪先等進士及第出身有差秋七月甲午以議獄不當下郎中魏應召等於獄右都御史熊浹削籍八月丙子張璉桂萼罷壬午始親祭山川著為令九月癸巳召張璉復入閣癸丑楊一清罷是月免兩畿河南被災稅糧振江西湖廣饑冬十月癸亥朔日有食之己巳除外戚世封著為令十一月庚子召桂萼復入閣甲辰振浙江災戊申禱雪己酉雪丁巳親詣郊壇告謝百官表賀是年天方賽

瑪爾堪吐魯番入貢

九年春正月丁酉大祀天地於南郊丙午作先蠶壇於北郊丁巳振山西饑二月戊辰耕藉田乙亥振京師饑丁丑禁官民服舍器用踰制三月丁巳皇后親蠶於北郊夏四月丙戌振延綏饑五月己亥更建四郊六月癸亥立曲阜孔顏孟三氏學八月壬午免江西被災稅糧九月壬辰罷雲南鎮守中官乙未免南畿被災稅糧冬十一月辛丑更正孔廟祀典定孔子謚號曰至聖先師

孔子已酉祀昊天上帝於南郊禮成大赦是年流球入貢

十年春正月辛卯祈穀於大祀殿奉太祖太宗配甲午
更定廟祀奉德祖於祧廟乙巳桂萼致仕二月甲戌免
盧鳳淮揚被災秋糧壬申賜張璉名字敬三月戊申罷
四川分守中官夏四月丁巳皇后親蠶於西苑甲子禘
於太廟五月壬子祀皇地祇於方澤閏六月己丑罷浙
江湖廣福建兩廣及獨石萬全永寧鎮守中官秋七月

癸丑侍郎葉相振陝西饑戊午張孚敬罷辛巳鄭王厚
烷獻白雀薦之宗廟八月辛丑改安陸州曰承天府九
月乙丑西苑宮殿成設成祖位致祭宴羣臣丙寅以禮
部尚書李時兼文淵閣大學士預機務壬申幸西苑御
無逸殿命李時翟鑾進講宴儒臣於幽風亭冬十一月
甲寅祀天於南郊戊辰免陝西被災秋糧丁丑召張孚
敬復入閣十二月戊子御史喻希禮石金因修醮請宥
議禮諸臣罪下錦衣衛獄

十一年春正月辛未祈穀於圓丘始命武定侯郭勛攝
事二月戊戌免湖廣被災稅糧三月戊辰賜林大欽等
進士及第出身有差夏四月辛卯續封常遇春李文忠
卹愈湯和後為侯五月丙子起前吏部尚書方獻夫以
原官兼武英殿大學士預機務六月壬午免畿內被災
秋糧甲申續封劉基後誠意伯秋七月戊辰免南畿被
災夏稅八月戊子以星變勅羣臣修省辛丑張孚敬罷
九月丁巳振陝西饑丁卯免廬鳳淮揚滁和徐被災稅

種冬十月甲申編修楊名以災異陳言下獄謫戍是月
兗山東被災稅糧振山西饑十一月甲寅四川巡撫都
御史宋滄獻白兔羣臣表賀庚申祀天於南郊十二月
乙亥免畿內被災稅糧是年琉球哈密吐魯番天方賽
瑪爾堪入貢

十二年春正月丙午河南巡撫都御史吳山獻白鹿羣
臣表賀自後諸瑞異表賀以為常丙辰召張孚敬復入
閣是月免浙江河南被災稅糧二月乙酉振雲南饑三

月丙辰釋奠於先師孔子秋八月乙未以皇子生詔赦天下九月庚戌廣東巢賊亂提督侍郎陶諧討平之冬十月乙亥大同兵亂殺總兵官李瑾代王奔宣府丙子下建昌侯張延齡於獄十一月己亥振遼東災癸丑翟鑾以憂去十二月己卯濟農犯寧夏總兵官王効副總兵梁震擊敗之是年吐魯番天方入貢

十三年春正月癸卯廢皇后張氏士子立德妃方氏為皇后二月己丑總督宣大侍郎張瓚撫定大同亂卒辛

卯代王返國三月壬申振大同被兵者乙酉濟農犯響
水堡叅將任傑擊敗之夏四月己酉方獻夫致仕六月
甲子南京太廟災秋八月壬子寇犯花馬池梁震禦却
之冬十一月庚午祀天於南郊是年琉球入貢

十四年春正月壬申罷督理倉場中官丙戌莊肅皇后
崩二月己亥作九廟丁未禁冠服非制三月戊子葬孝
靜皇后於康陵己丑遼東軍亂執都御史李經夏四月
甲午張學敬致仕召費宏復入閣丙申賜韓應龍等進

士及第出身有差丙午廣寧兵亂六月濟農犯大同總
兵官魯綱禦却之秋七月甲申廣寧亂卒平八月乙巳
詔九卿會推巡撫官著為令冬十月戊申費宏卒十一
月乙亥祀天於南郊是年烏斯藏入貢

十五年春二月癸巳振湖廣災三月丙子奉章聖皇太
后如天壽山謁陵免昌平今年稅糧三之二賜高年粟
帛癸未謁恭讓章皇后景皇帝陵是日還宮夏四月癸
巳詔建山陵癸卯詣七陵祭告癸丑還宮是月濟農犯

甘涼總兵官姜瓖擊敗之秋九月庚午如天壽山丁丑
還宮是秋濟農犯延綏官軍四戰皆敗之冬十月己亥
更定世廟為獻皇帝廟戊申如天壽山壬子還宮十一
月戊午以皇長子生詔赦天下辛巳祀天於南郊十二
月辛卯九廟成閏月癸亥以定廟制加上兩宮皇太后
徽號詔赦天下乙丑以禮部尚書夏言兼武英殿大學
士預機務丙寅享九廟甲戌以道士邵元節為禮部尚
書是年免山西山東被災稅糧琉球烏斯藏入貢

十六年春二月壬子安南黎寧遣使告莫登庸之難癸酉如天壽山三月甲申還宮丙午幸大峪山視壽陵夏四月癸丑還宮六月癸酉濟農寇宣府指揮趙鏜戰死秋八月復寇宣府殺叅將張國輔冬十一月故昌國公張鶴齡下獄瘐死是年吐魯番天方賽瑪爾堪入貢

十七年春二月戊辰如天壽山壬申還宮三月壬辰賜茅瓚等進士及第出身有差辛丑命咸寧侯仇鸞為征夷副將軍充總兵官兵部尚書毛伯溫叅贊軍務討安

南莫登庸夏四月庚戌如天壽山甲寅還宮戊午罷安
南師甲子禱雨於郊壇戊辰雨六月寇犯宣府都指揮
周冕戰死丙辰定明堂大饗禮下戶部侍郎唐胄於獄
秋七月辛卯開河南雲南銀礦癸巳慈寧宮成八月甲
辰濟農犯河西總督都御史劉天和禦却之丙辰以禮
部尚書掌詹事府事顧鼎臣兼文淵閣大學士預機務
九月戊寅免畿內被災稅糧辛巳上太宗廟號成祖獻
皇帝廟號睿宗遂奉睿宗神主祔太廟躋武宗上辛卯

大享上帝於元極寶殿奉睿宗配乙未如天壽山丁酉
還宮冬十一月辛未朔詣南郊上皇天上帝號還詣太
廟上太祖高皇帝高皇后尊號辛卯祀天於南郊詔赦
天下乙未免江西被災稅糧十二月癸卯章聖皇太后
崩壬子如大峪山相視山陵甲寅還宮乙卯李時卒戊
午振寧夏災是年琉球吐魯番入貢

十八年春二月庚子朔立皇子載壑為皇太子封載垕
為裕王載圳景王辛丑詔赦天下起黃綰為禮部尚書

宣諭安南壬寅起程鑾為兵部尚書兼右都御史充行
邊使丁未祈穀於元極寶殿先賢曾子裔孫質粹為翰
林院世襲五經博士壬子振遼東饑癸丑安南莫方瀛
請降乙卯幸承天太子監國辛酉次真定望於北嶽丁
卯次衛輝行宮火三月己巳渡河祭大河之神辛未次
鈞州望於中嶽甲戌免畿內被災稅糧庚辰至承天辛
巳謁獻陵甲申享上帝於龍飛殿奉睿宗配秩於國社
國稷徧羣祀戊子御龍飛殿受賀詔赦天下給復承天

三年免湖廣明年田賦五之二歲內河南三之一夏四月壬子至自承天壬戌免湖廣被災稅糧甲子幸大峪山丙寅還宮秋閏七月庚申葬獻皇后於顯陵辛酉復命仇鸞毛伯溫征安南九月辛酉如天壽山侍郎王杲振河南饑冬十月丙寅還宮十一月丙申祀天於南郊是年日本哈密入貢

十九年春正月丙午召翟鑾復入閣辛亥濟農寇大同殺指揮周岐三月戊戌詔修仁壽宮夏六月辛巳衛拉

特部長款塞秋七月癸卯濟農入萬全右衛總兵官白
爵逆戰於宣平敗之壬子又敗之於桑乾河戊午振江
西災八月丁丑太僕卿楊最諫服丹藥予杖死九月濟
農犯固原周尚文敗之於黑水苑延綏總兵官任傑追
擊於鐵柱泉又敗之己酉召仇鸞還冬十月庚申罷礦
場甲子顧鼎臣卒十一月丙辰慈慶官成是年琉球日
本入貢

二十年春正月免南畿被災稅糧二月乙丑顯陵成給

復承天三年丙寅御史楊爵言時政下錦衣衛獄三月
乙巳賜沈坤等進士及第出身有差是春濟農寇蘭州
參將鄭東戰死夏四月己未莫登庸納款改安南國為
安南都統使司以登庸為都統使辛酉九廟災燬成祖
仁宗主丙子詔行寬恤之政五月戊子採木於湖廣四
川甲寅振遼東饑六月振畿內山西饑秋七月丁酉諸
達阿布該遣使款塞求貢詔却之是月免河南陝西山
東被災稅糧八月辛酉昭聖皇太后崩庚辰夏言罷是

月詣達阿布該濟農分道入寇命總兵官趙卿帥京營兵都御史翟鵬理軍務禦之九月乙未朔國公郭勛以罔利虐民下獄死辛亥詣達犯山西入石州冬十月癸丑振山西被寇者復徭役二年丁卯召夏言復入閣十一月辛卯葬敬皇后於泰陵丙申免四川被災稅糧是年琉球入貢

二十一年夏四月庚申大高元殿成閏五月戊辰詣達阿布該遣使款大同塞巡撫都御史龍大有誘殺之六

月辛卯諳達寇朔州壬寅入雁門關丁未犯太原秋七月己酉朔日有食之夏言罷己未諳達寇潞安掠沁汾襄垣長子叅將張世忠戰死八月辛巳募兵於直隸山東河南壬午振山西被兵州縣免田租癸巳以禮部尚書嚴嵩兼武英殿大學士預機務九月癸亥員外郎劉魁諫營雷殿予杖下獄冬十月丁酉宮婢楊金英謀逆伏誅遂磔端妃曹氏寧嬪王氏於市是年免畿內陝西河南福建被災稅糧安南入貢

明史卷十七

欽定四庫全書

史部
明史卷

十八至
二十一

內閣中書臣瞿照覆勘

總校官編修臣朱鈴

欽定四庫全書

明史卷十八

大學士張廷玉等奉 勅修

本紀第十八

世宗二

二十二年春正月丙午朔日有食之三月庚戌復遣使採木
湖廣是春諳達屢入塞秋八月犯延綏總兵官吳英等擊
敗之冬十月朶顏入寇殺守備陳舜十二月乙酉免南畿

被災稅糧是年占城吐魯番賽瑪爾堪天方烏斯藏入貢
二十三年春正月丙寅諳達犯黃崖口二月戊寅犯大
水谷三月癸丑犯龍門所丁巳賜秦鳴雷等進士及第
出身有差秋七月諳達犯大同總兵官周尚文戰於黑
山敗之八月甲午翟鑾罷九月癸卯免浙江被災稅糧
丁未以吏部尚書許讚兼文淵閣大學士禮部尚書張
璧兼東閣大學士預機務壬子振湖廣災冬十月戊辰
免河南被災稅糧甲戌諳達入萬全右衛戊寅掠蔚州

至於完縣京師戒嚴乙酉以寇警連總督宣大兵部尚書翟鵬巡撫薊鎮僉都御史朱方下獄鵬謫戍方杖死十一月庚子京師戒嚴加方士陶仲文少師十二月丙子振江西災是年安南入貢日本以無表却之

二十四年春二月戊申詔流民復業予牛種開墾閒田者給復十年三月壬午總督宣大兵部侍郎張漢以在鎮不法下獄謫戍夏五月壬戌朔日有食之六月壬辰太廟成是夏免畿輔山西陝西被災稅糧秋七月壬戌

有事於太廟赦徒罪以下八月丙午瘞暴骸已酉張璧卒庚戌諳達犯松子嶺殺守備張文翰是月犯大同叅將張鳳指揮劉欽等戰死九月丁丑召夏言入閣冬十一月辛巳許讚罷是年安南琉球烏斯藏入貢

二十五年春三月戊辰四川白草番亂夏五月戊辰諳達款大同塞邊將殺其使六月甲辰犯宣府千戶汪洪戰死秋七月癸酉以醴泉出承華殿廷臣表賀停諸司封事二十日嗣後慶賀齋祀悉停封奏是月諳達犯延

安慶陽八月壬子免山東被災稅糧九月詣達犯寧夏
冬十月丁亥犯清平堡遊擊高極戰死癸巳代府奉國
將軍克灼謀反伏誅甲午殺故建昌侯張延齡十二月
丁未免河南被災稅糧是年吐魯番入貢

二十六年春三月庚午賜李春芳等進士及第出身有
差夏四月乙巳巡撫四川都御史張時徹副總兵何卿
討平白草叛番已酉詣達求貢拒之秋七月丙辰河決
曹縣八月丙戌免陝西被災稅糧九月戊辰戶部尚書

王杲以科臣劾其通賄下獄遣戍閏月丙午振成都饑
冬十一月壬午大內火釋楊爵於獄乙未皇后崩十二
月辛酉甘肅總兵官仇鸞以貪虐逮下獄乙亥海寇犯
寧波台州是年琉球入貢

二十七年春正月巴圖爾寇廣寧叅將閻振戰死癸未
以議復河套逮總督陝西三邊侍郎曾銑杖給事中御
史於廷罷夏言三月癸巳殺曾銑逮夏言癸卯出仇鸞
於獄夏五月丙戌葬孝烈皇后秋七月戊寅京師地震

庚子西苑進嘉穀薦於太廟八月丁巳諳達犯大同指
揮顧相等戰死周尚文追敗之於次野口九月壬午犯
宣府深入永寧懷來隆慶守備魯承恩等戰死乙未免
陝西被災稅糧冬十月癸卯殺夏言十一月乙未詔撫
按官採生沙金是年日本入貢

二十八年春二月乙巳振陝西饑辛亥以南京吏部尚
書張治為禮部尚書兼文淵閣大學士祭酒李本為少
詹事兼翰林學士入閣預機務壬子諳達犯宣府指揮

董賜等敗沒遂東犯永寧關南大震乙卯周尚文敗諳達於曹家莊丙辰宣府總兵官趙國忠又敗之於大濬
沈三月辛未朔日有食之丁亥皇太子薨秋七月浙江
海賊起九月朵顏三衛犯遼東冬十月辛丑免畿內被
災稅糧是年日本琉球入貢

二十九年春三月壬午賜唐汝楫等進士及第出身有
差是月瓊州黎賊平六月丁巳諳達犯大同總兵官張
達副總兵林椿戰死閏月癸酉逮總督宣大兵部右侍

郎郭宗臯巡撫大同右副都御史陳耀下獄臯謫戍耀
杖死是夏免陝西河南江北被災夏稅秋八月丙寅封
方士陶仲文為恭誠伯丁丑諳達大舉入寇攻古北口
薊鎮兵潰戍寅掠通州駐白河分掠畿甸州縣京師戒
嚴召大同總兵官仇鸞及河南山東兵入援壬午薄都
城命仇鸞為平虜大將軍節制諸路兵馬巡撫保定都
御史楊守謙提督軍務左諭德趙貞吉宣諭諸軍癸未
始御奉天殿戒勅羣臣甲申寇退逮守通州都御史王

儀丙戌京師戒嚴杖趙貞吉謫外任丁亥仇鸞敗績於
白羊口兵部尚書丁汝璉巡撫侍郎楊守謙以守備不
設棄市杖左都御史屠僑刑部侍郎彭黠九月辛卯振
幾內被寇者乙未罷團營復三大營舊制設戎政府以
仇鸞總督之丁酉罷領營中官戊申免畿內被災稅糧
壬子廢鄭王厚烷為庶人冬十月甲戌張治卒辛巳刑
部郎中徐學詩疏劾嚴嵩奸貪下鎮撫司獄十一月癸
巳分遣御史選邊軍入衛壬寅祧仁宗祔孝烈皇后於

太廟是年琉球入貢

三十年春正月庚子錦衣衛經歷沈鍊疏劾嚴嵩黷貨
十罪廷杖戍邊三月壬辰開馬市於宣府大同兵部史
郎史道經理之夏四月壬午下經畧京城副都御史商
大節於獄秋九月乙未京師地震詔修省冬十一月諫
達犯大同是年免兩畿河南江西遼東貴州山東山西
被災稅糧

三十一年春正月壬辰諫達犯大同甲午入弘賜堡二

月癸丑振宣大饑辛酉諳達犯懷仁川指揮僉事王恭
戰死己巳建內府營操練內侍三月戊子大將軍仇鸞
帥師赴大同辛卯命禮部尚書徐階兼東閣大學士預
機務夏四月丙寅巴圖爾錫林阿犯新興堡指揮王相
等戰死丙子倭寇浙江五月甲申召仇鸞還戊申倭陷
黃巖秋七月丙申免陝西被災夏稅壬寅以倭警命山
東巡撫都御史王忬巡視浙江八月己未收仇鸞大將
軍印尋病死乙亥戮仇鸞屍傳首九邊己卯諳達犯大

同分掠朔應山陰馬邑九月丁酉犯山西三關壬辰犯
寧夏丁酉河決徐州庚子兵部侍郎蔣應魁左通政唐
國卿以冒邊功杖於廷癸卯罷各馬市冬十月己未
兵部尚書趙錦坐仇鸞黨戍邊壬戌免江西被災稅糧
是月築京師外城十二月丁巳光祿少卿馬從謙疏劾
中官杜泰泰誣從謙誹謗下獄杖死

三十二年春正月戊寅朔日食陰雲不見己卯侍郎吳
鵬振淮徐水災庚子兵部員外郎楊繼盛疏劾嚴嵩誤

國十罪下鎮撫司獄二月甲子倭犯溫州壬申諳達犯
宣府叅將史畧戰死三月丁丑振陝西饑辛巳吉納犯
延綏殺副總兵李梅壬午兵部侍郎楊博巡邊甲申振
山東饑甲午賜陳謹等進士及第出身有差甲辰諳達
犯宣府副總兵郭都戰死閏三月海賊汪直糾倭寇瀕
海諸郡至六月始去秋七月戊午諳達大舉入寇犯靈
邱廣昌乙丑河套諸部犯延綏己巳諳達犯浮圖峪遊
擊陳鳳朱玉禦之庚午河南賊師尚詔陷歸德及柘城

鹿邑八月丙子小王子犯赤城丙申師尚詔攻太康官
軍與戰於鄆陵敗績戊戌振山東災免稅糧九月丙午
諳達犯廣武巡撫都御史趙時春敗績總兵官李淶叅
將馮恩等力戰死辛酉以敵退告謝郊廟冬十月甲戌
振河南山東饑庚子師尚詔伏誅賊平辛丑京師外城
成是年琉球入貢

三十三年春正月壬寅朔以賀疏違制杖六科給事中
於廷戊辰官軍圍倭於南沙五閱月不克倭潰圍出轉

掠蘇松二月庚辰官軍敗績於松江乙丑倭犯通泰餘
衆入青徐界夏四月甲戌振畿內饑乙亥倭犯嘉興都
司周應楨等戰死乙酉陷崇明知縣唐一岑死之五月
壬寅倭掠蘇州丁巳南京兵部尚書張經總督軍務討
倭六月癸酉諳達犯大同總兵官岳懋戰死己丑侍郎
陳儒振大同軍士秋八月癸未倭犯嘉定官軍敗之庚
寅復戰敗績九月丁卯諳達犯古北口總督楊博禦却
之是年暹羅吐魯番天方賽瑪爾堪烏斯藏入貢

三十四年春正月丁酉朔倭陷崇德攻德清二月丙戌
工部侍郎趙文華祭海兼區處防倭是月諳達犯薊鎮
叅將趙傾葵等戰死三月甲寅蘇松兵備副使任環敗
倭於南沙夏四月戊子諳達犯宣府叅將李光啟被執
不屈死五月甲午總督侍郎張經副總兵俞大猷擊倭
於王江涇大破之乙巳倭分道掠蘇州屬縣己酉趙文
華誣劾張經畏吳失機逮下獄六月壬午命兵部侍郎
楊宜總督軍務討倭秋七月乙巳倭陷南陵流劫蕪湖

太平丙辰犯南京丁巳趙文華胡宗憲譖提督浙福都御史李天寵嗜酒縱寇逮下獄八月壬辰蘇松巡撫都御史曹邦輔敗倭於澣墅九月乙未趙文華及巡按御史胡宗憲擊倭於陶宅敗績丙午譖達犯大同宣府戊午犯懷來京師戒嚴辛酉叅將馬芳敗寇於保安是秋免江北山東被災秋糧冬十月庚寅殺張經李天寵楊繼盛辛卯倭犯興化台州犯會稽十一月壬辰朔日有食之庚辰倭犯興化泉州閏月丁丑免畿內水災稅糧

十二月甲午開山東四川銀礦壬寅山西陝西河南地
入震河渭溢死者八十三萬有奇是年琉球入貢

二十五年春正月壬午官軍擊倭於松江敗績八月甲
丁振平陽延安災己亥楊宜罷戊午吏部尚書李默坐
訐謗下錦衣衛獄論死命巡撫侍郎胡宗憲總督軍務
討倭三月丁丑賜諸大綬等進士及第出身有差夏四
月丙申振陝西災甲辰倭寇無為州同知齊恩戰死辛
亥遵擊宗禮擊倭於崇德敗沒五月乙丑命趙文華提

督江南浙江軍務丁亥命左通政王槐採礦銀於玉旺
峪六月丙申總兵官俞大猷敗倭於黃浦辛丑諸達犯
亶府殺遊擊張紘秋七月辛巳胡宗憲破倭於乍浦八
月壬寅詔採芝辛亥胡宗憲襲破海賊徐海於梁莊九
月乙丑徽王載堦縱恣不法廢為庶人免南畿被災稅
種壬午以平浙江倭祭告郊廟社稷冬十月丙戌朔日
有食之十一月戊午達喇蘇犯廣寧總兵官殷尚質等
戰死十二月丁未祀環慶

三十六年春二月諳達犯大同三月癸丑巴圖爾寇遷
安副總兵蔣承勛力戰死是月吉納寇延綏殺副總兵
陳鳳夏四月丙申奉天華蓋謹身三殿災壬寅下詔引
咎修齋五日止諸司封事停刑五月癸丑倭犯揚徐入
山東界癸亥採木於四川湖廣辛未倭犯天長盱眙遂
攻泗州丙子犯淮安六月乙酉兵備副使于德昌叅將
劉顯敗倭於安東甲午罷陝西礦秋七月庚午詔廣東
採珠九月癸亥殺沈鍊是月諳達子錫林阿寇應朔毀

七十餘堡冬十一月丁丑錫林阿圖右衛城十二月乙卯海盜汪直伏誅是冬免山東浙江被災稅糧是年琉球入貢

三十七年春正月癸亥罷河南礦三月丙辰總督宣大侍郎楊順以縱寇逮下獄甲子提督福建軍務右都御史阮鶚以貪縱逮下獄辛未始免三大營聽征官軍營造工役夏四月癸未振遼東饑辛巳倭分犯浙江福建秋八月己未吉納犯永昌京州圍甘州冬十月癸丑禮

邵進瑞芝一千八百六十本詔廣求徑尺以上者十一月辛亥諭法司恤刑是年琉球暹羅入貢

二十八年春二月庚午巴圖爾犯潘家口渡灤河逼三屯營三月己卯掠遷安薊州王田庚寅賜丁士美等進士及第出身有差癸巳倭犯浙東海道副使譚綸敗之甲午逮浙江總兵官俞大猷夏四月丁未倭犯通州甲寅倭攻福州庚申倭攻淮安巡撫鳳陽都御史李遂敗之於姚家蕩倭退據廟灣丙寅副使劉景韶大破倭於

印莊五月辛巳逮總督薊遼右都御史王忬下獄甲午
劉景韶破倭於廟灣江北倭平六月乙巳錫林阿犯大
同秋八月己未李遂胡宗憲破倭於劉家莊甲子振遼
米饑給牛種是月諳達犯土木遊擊董國忠等戰死九
月犯宣府是年吐魯番天方賽瑪爾堪魯默特哈密進
維入貢

三十九年春正月丙戌諳達犯宣府二月丁巳南京振
武營兵變殺總督糧儲侍郎黃懋官戊午振順天永平

饑倭犯潮州三月癸未大同總兵官劉漢襲敗額森於
灰河丁亥達喇蘇犯廣寧陷中前所殺守備武守爵黃
廷勛夏五月壬午振山西三關饑壬辰盜入廣東博羅
縣殺知縣舒顥秋七月乙丑朔巴圖爾犯薊西遊擊胡
鎮禦却之庚午劉漢襲諳達於豐州破之九月己巳諳
達犯朔州廣武冬十二月土默特犯海州東勝堡是月
閩廣賊犯江西是年免畿內山西山東湖廣陝西被災
稅糧暹羅入貢

四十年春二月辛卯朔日當食不見振山東饑丁未景
王之國三月壬戌振京師饑夏四月丁未振山西饑五
月乙亥李本以憂去閏月丙辰賊犯泰和殺副使汪一
中指揮王應鵬秋七月己丑朔日有食之庚戌諸達犯
宣府副總兵馬芳禦却之九月庚子犯居庸關叅將胡
鎮禦却之辛丑振南畿災冬十一月甲午以禮部尚書
袁煒為戶部尚書兼武英殿大學士預機務庚戌吉納
犯寧夏進逼固原辛亥萬壽宮災十二月丙寅巴圖爾

犯遼東蓋州是年烏斯藏入貢

四十一年春三月辛卯白兔生子禮部請告廟許之羣臣表賀壬寅賜申時行等進士及第出身有差己酉重作萬壽宮成夏五月壬寅嚴嵩以罪免子世蕃下獄壬子土默特攻湯站堡副總兵黑春力戰死秋九月壬午三殿成改奉天曰皇極華蓋曰中極謹身曰建極冬十月免南畿江西被災稅糧十一月乙酉分遣御史訪求方士法書丁亥逮胡宗憲尋釋之辛丑吉納犯寧夏副

總兵王勲戰死己酉倭陷興化是月延綏總兵官趙奇
分部出塞襲寇敗之免陝西湖廣被災及福建被寇者
稅糧是年琉球入貢

四十二年春正月戊申諳達犯宣府南掠隆慶夏四月
庚申倭犯福清總兵官劉顯俞大猷合兵殲之丁卯副
總兵戚繼光破倭於平海衛秋八月乙亥總兵官楊照
襲寇於廣寧塞外力戰死冬十月丁卯錫林阿巴圖爾
破牆子嶺入寇京師戒嚴詔諸鎮兵入援戊辰掠順義

三河總兵官孫臍敗死乙亥大同總兵官姜應熊禦寇
密雲敗之十一月丁丑京師戒嚴是年琉球入貢

四十三年春正月壬辰土默特哈斯坦寇薊鎮總兵官
胡鎮叅將白文智禦却之二月己酉伊王典模僭越不
法廢為庶人戊午倭犯仙遊總兵官戚繼光大敗之福
建倭平閏月丙申盜據漳平知縣魏文瑞死之三月己
未官軍擊潮州倭破之夏四月乙亥免畿內被災稅糧
五月壬寅朔日有食之乙卯獲桃於御幄羣臣表賀六

卷十八
月辛卯倭犯海豐俞大猷破之冬十二月南韶賊起守
備賀鐸指揮蔡允元被執死之諸達犯山西遊擊梁平
守備祁謀戰死是年西番哈密安南入貢魯默特貢獅
子

四十四年春三月丁巳賜范應期等進士及第出身有
差己未袁煒致仕辛酉嚴世蕃伏誅是月土默特犯遼
東都指揮線補袞楊維藩戰死夏四月庚辰命吏部尚
書嚴訥禮部尚書李春芳並兼武英殿大學士預機務

壬午諳達犯肅州總兵官劉承業禦却之六月甲戌芝
生睿宗原廟柱告廟受賀遂建玉芝宮秋八月壬午獲
仙藥於御座告廟冬十一月癸卯嚴訥致仕戊申奉安
獻皇帝后神主於玉芝宮是年琉球入貢

四十五年春二月癸亥戶部主事海瑞疏諫齋醮下錦
衣衛獄是月俞大猷討廣東山賊大破之浙江江西礦
賊陷婺源三月己未以吏部尚書郭朴兼武英殿大學
士禮部尚書高拱兼文淵閣大學士預機務夏四月壬

戊朔日有食之丙戌詣達犯遼東六月丙子旱親禱雨
於凝道雷軒越三日雨羣臣表賀秋七月乙未詣達犯
萬全右衛冬十月丁卯犯固原總兵官郭江敗死癸酉
犯偏頭關閏月甲辰犯大同叅將崔世榮力戰死十一
月己未帝不豫十二月庚子大漸自西苑還乾清宮是
日崩年六十遺詔裕王嗣位隆慶元年正月上尊謚廟
號世宗葬永陵

贊曰世宗御極之初力除一切弊政天下翕然望治廟

迭議大禮輿論沸騰倖臣假托尋興大獄夫天性至情
君親大義追尊立廟禮亦宜之然升祔太廟而躋於武
宗之上不已過乎若其時紛紜多故將疲於邊賊訐於
內而崇尚齋醮營建繁興百餘年富庶治平之業因之
漸替矣然且倚任權奸果戮直臣以快其志亦獨何哉

明史卷十八

欽定四庫全書

明史卷十九

大學士張廷玉等奉 勅修

本紀第十九

穆宗

穆宗契天隆道淵懿寬仁顯文廣武純德弘孝莊皇帝
諱載垕世宗第三子也母杜康妃嘉靖十八年二月封
裕王與莊敬太子景恭王同日受冊已而莊敬薨世宗

以王長且賢繼序已定而中外危疑屢有言者乃令景王之國四十五年十二月庚子世宗崩壬子即皇帝位以明年為隆慶元年大赦天下先朝政令不便者皆以遺詔改之召用建言得罪諸臣死者卹錄方士悉付法司治罪罷一切齋醮工作及例外採買免明年天下田賦之半及嘉靖四十三年以前逋賦釋戶部主事海瑞於獄是年吐魯番入貢

隆慶元年春正月丙寅罷睿宗明堂配享戊辰復鄭王

厚煥爵丁丑追尊母康妃為孝恪皇太后二月戊子祭
大社大稷乙未冊妃陳氏為皇后以吏部侍郎陳以勤
為禮部尚書兼文淵閣大學士禮部侍郎張居正為吏
部左侍郎兼東閣大學士預機務三月壬申葬肅皇帝
於永陵乙酉土默特犯遼陽指揮王承德戰歿夏四月
丙戌朔享太廟丙午禁屬國獻珍禽異獸丁未御經筵
五月己未黃河決口工成辛酉祀地於北郊丁丑高拱
罷六月戊戌以霖雨修省素服避殿御皇極門視事是

月新河復決秋七月辛巳招撫山東河南被災流民復
五年八月癸未朔釋奠於先師孔子九月乙卯譖達寇
大同詔嚴戰守癸亥譖達陷石州殺知州王亮采掠交
城文水壬申土默特犯薊鎮掠昌黎盧龍至於灤河詔
宣大總督侍郎王之誥還駐懷來巡撫都御史曹亨駐
兵通州甲戌郭朴致仕免襄陽鄖陽被災秋糧乙亥總
兵官李世忠援永平與敵戰於撫寧京師戒嚴冬十月
丙戌寇退京師解嚴甲辰諭羣臣議邊防事宜寧夏總

兵官雷龍出塞邀擊河套部敗之十一月癸亥祀天於南郊是年廣東賊大起琉球入貢

二年春正月己卯給事中石星疏陳六事杖闕下出為氏二月丁酉寇犯柴溝堡守備韓尚忠戰死己亥耕藉田丁未如天壽山謁長陵永陵庚戌還宮免所過田租有差三月辛酉立皇子珝鈞為皇太子詔赦天下乙丑命廣西總兵官俞大猷討廣東賊戊辰賜羅萬化等進士及第出身有差丙子幸南海子戊寅京師地震命百

官修省夏六月庚辰遣使而畿錄囚己丑廣東賊曾一本寇廣州殺知縣劉師顏秋七月己酉賊入廉州丙寅徐階致仕冬十月戊寅免南畿被災秋糧振淮徐饑己亥遼王憲儼僭侈不法廢為庶人甲辰免畿內河南被災秋糧十一月壬子宣府總兵官馬芳襲諳達於長水海子又敗之鞞于山辛酉免江西被災稅糧戊辰祀天於南郊己巳命廣東福建督撫將領會剿曾一本十二月庚寅世宗神主祔太廟丁酉限勲戚莊田是年琉球

八貢

三年春正月壬子大同總兵官趙奇敗諸達於弘賜堡
二月庚辰免陝西被災秋糧三月戊辰曾一本陷碣石
衛裨將周雲翔殺叅將耿宗先叛附於賊夏四月己丑
總兵官盧龍出塞襲河套部敗之五月庚戌總兵官郭
成等破賊於平山周雲翔伏誅甲寅御史詹仰庇請罷
糜費斥為民秋七月壬午河決沛縣乙酉詔天下有司
實修積穀備荒之政壬辰遣使振沿河被災州縣八月

癸丑廣東賊平曾一本伏誅壬戌以禮部尚書趙貞吉兼文淵閣大學士預機務丁卯振南畿浙江山東水災九月丙子諳達犯大同掠山陰應州懷仁渾源辛卯大閱冬十一月甲戌祀天於南郊庚辰京師地震有聲敕修省十二月己亥命廠衛密訪部院政事庚申召高拱復入闕乙丑尚寶司丞鄭履淳以言事廷杖下獄是冬免兩畿山東浙江河南湖廣稅糧是年陝西賊起琉球吐魯番入貢

四年春正月乙巳朔日有食之免朝賀辛未避殿修省
是月倭入廣海衛城三月壬午分設三大營文武提督
六人夏四月戊戌京師地震乙巳詣達寇大同宣府官
兵拒却之是月陝西賊寇四川五月癸酉給事中李己
陳吾德諫買金寶已廷杖下獄吾德斥為民秋七月己
巳禁章奏浮冗命撫按官嚴禁有司酷刑戊子陳以勤
致仕乙未免四川被災稅糧八月庚戌宣大告警敕邊
備九月癸酉陝西水災蠲振有差甲戌河決邳州壬午

免北畿湖廣被災稅糧癸未諳達復寇大同副總兵錢棟戰死戊子犯錦州總兵官王治道等戰死甲午罷京營文武提督置總督協理大臣冬十月癸卯諳達孫巴噶奈濟來降丁未以巴噶奈濟為指揮使壬戌考察給事中御史十一月丁丑諳達乞封己卯祀天於南郊乙酉趙貞吉罷己丑以禮部尚書殷士儋兼文淵閣大學士預機務十二月丁酉諳達執叛人趙全等九人來獻詔遣巴噶奈濟歸厚賜之乙卯受俘磔趙全等於市

五年春二月甲午廷臣及朝覲官謁皇太子於文華左門己未封皇子翊鏐為潞王三月己卯賜張元忭等進士及第出身有差己丑封諱達為順義王夏四月甲午河復決邳州五月壬戌古田獐賊平戊寅李春芳致仕六月辛卯京師地震者三敕修省甲辰授河套部長吉納為都督同知甲寅順義王諱達貢馬告廟受賀丙辰諱達執趙全餘黨十三人來獻秋八月癸卯許河套部互市九月癸未三鎮貢市成冬十月己亥河南山東大

水申飭河防十一月己巳殷士僇致仕是年琉球吐魯
番入貢

六年春正月辛未築徐州至宿遷隄三百七十里二月
丙申倭寇廣東陷神電衛大掠山寇復起閏月丁卯御
皇極殿門疾作遽還宮乙亥倭寇高雷官軍擊敗之夏
四月戊辰以禮部尚書高儀兼文淵閣大學士預機務
五月壬辰免廣東用兵諸郡逋賦己酉大漸召大學士
高拱張居正高儀受顧命庚戌崩於乾清宮年三十有

六七月丙戌上尊謚廟號穆宗葬昭陵

贊曰穆宗在位六載端拱寡營躬行儉約尚食歲省巨
萬許諳達封貢減賦息民邊陲寧謐汜可小康矣第柄
臣相軋門戶漸開而帝未能振肅乾綱矯除積習蓋亦
寬恕有餘剛明不足者與

明史卷十九

欽定四庫全書

明史卷二十

大學士張廷玉等奉勅修

本紀第二十

神宗一

神宗範天合道哲肅敦簡光文章武安仁止孝顯皇帝
諱翊鈞穆宗第三子也母貴妃李氏隆慶二年立為皇
太子時方六歲性岐嶷穆宗嘗馳馬宮中諫曰陛下天

下主獨騎而騁寧無銜橛憂穆宗喜下馬勞之陳皇后
病居別宮每晨隨貴妃候起居后聞履聲輒喜為強起
取經書問之無不響答貴妃亦喜由是兩宮益和六年
五月穆宗崩六月乙卯朔日有食之甲子即皇帝位以
明年為萬歷元年詔赦天下祀建文朝盡節諸臣於鄉
有苗裔者卹錄庚午罷高拱居正代拱為首輔丁丑高
儀卒壬午以禮部尚書呂調陽兼文淵閣大學士預機
務秋七月丁亥初通漕運於密雲庚寅察京官己亥戒

諭廷臣詔曰近歲以來士習澆漓官方利缺詆老成為
無用矜便倭為有才遂使朝廷威福之柄徒為人臣報
復之資用是薄示懲戒餘皆曲貸諸臣宜祓除前愆共
維新政若溺於故習背公徇私獲罪祖宗朕不敢赦庚
子尊皇后曰仁聖皇太后貴妃曰慈聖皇太后八月戊
午祀大社大稷九月甲午葬莊皇帝於昭陵冬十月丙
辰彗星見己未命侍郎王遴吳百朋汪道昆分閱邊防
辛酉傳刑十一月乙未河工成十二月辛酉振榆林延

綏饑甲戌以不行未期罷明年元夕燈火及宮中宴

萬歷元年春二月癸丑御經筵甲戌廣西府江叛瑤平

三月丙申詔內外官舉將材夏四月乙丑潮惠賊平庚

午旱諭百官修省五月甲申詔內外官慎刑獄六月壬

申振淮安水災秋七月河決徐州八月癸丑罷海運九

月癸未振荊州承天及濟南災丙戌四川都掌蠻平癸

卯停刑冬十一月庚辰命諸司立程限文簿以防稽緩

十二月己未振遼東饑是年暹羅琉球入貢

二年春正月甲午召見朝覲廉能官於皇極門二月甲寅振四川被寇諸縣三月癸巳賜孫繼皋等進士及第出身有差夏四月丙寅詔內外官行久任之法五月辛丑奉穆宗神主祔太廟八月己巳振山西災庚午振淮揚徐水災冬十月中寅決囚丁卯視朝閱銓選閏十二月庚寅詔罷明年元夕燈火是年琉球入貢

三年春正月丁未享太廟二月戊寅祀大社大稷辛巳詔南京職務清簡官不必備丙申始命日講官分直記

注起居纂輯章奏臨朝侍班夏四月己巳朔日有食之
既壬申書謹天戒任賢能親賢臣遠嬖佞明賞罰謹出
入慎起居節飲食收放心存敬畏納忠言節財用十二
事於座右以自警五月庚子淮揚大水詔察二府有司
貪酷老疾者罷之六月戊辰浙江海盜戍寅命撫按官
有司賢否一體薦劾不得偏重甲科是夏蘇松常鎮大
水秋八月丙子以禮部侍郎張四維為禮部尚書兼東
閣大學士預機務丁丑河決高郵碭山戊子免淮揚鳳

徐被水田租九月戊午京師地震冬十月丁卯地再震
敕羣臣修省戊辰停刑十一月乙巳祀天於南郊十二
月辛未詔罷明年元夕燈火是年安南琉球暹羅吐魯
番入貢

四年春正月丁巳遼東巡按御史劉臺以論張居正逮
下獄削籍夏五月戊申祀地於北郊六月庚辰復遣內
臣督蘇杭織造秋七月丁酉諭吏戶二部清吏治蠲逋
賦有差明年漕糧折收十之三壬寅遣御史督修江浙

水利甲辰修泗州祖陵辛亥草灣河工成八月壬戌釋奠於先師孔子是秋河決崔鎮冬十月乙亥振徐州及豐沛睢寧金鄉魚臺單曹七縣水災蠲租有差是年安南琉球烏斯藏吐魯番天方賓瑪爾堪魯默特哈密入貢

五年春正月己酉詔鳳陽淮安力舉營田二月乙丑振廣西饑三月乙巳賜沈懋學等進士及第出身有差夏五月癸巳廣東羅旁叛瑤平秋八月癸亥河復決崔鎮

閏月乙酉朔日食陰雲不見九月己卯起復張居正冬
十月乙巳以論張居正奪情杖編修吳中行檢討趙用
賢員外郎艾穆主事沈思孝罷黜謫戍有差丁未杖進
士鄒元標戍邊十一月癸丑以星變考察百官是年疏
球入貢

六年春正月築決河堤二月戊戌免充青登萊所屬逋
賦庚子立皇后王氏三月甲寅以禮部尚書馬自強兼
文淵閣大學士吏部侍郎申時行兼東閣大學士預機

務甲子張居正葬父歸夏四月乙未免湖廣四川逋賦
丙午詔戶部歲增金花銀二十萬兩六月乙未張居正
還朝秋七月乙卯呂調陽致仕壬申詔選內豎三千五
百人丙子詔江北諸府民年十五以上無田者官給牛
一頭田五十畝開墾三年後起科九月庚午詔蘇州諸
府開墾荒田六年後起科辛未停刑冬十月辛卯馬自
強卒十一月辛酉祀天於南郊是年烏斯藏入貢

七年春正月戊辰詔毀天下書院二月己丑遣使分閱

邊防三月甲子免淮揚逋賦夏五月癸亥祀地於北郊
六月辛卯蠲兩畿山東陝西勲戚田賦秋七月壬子振
蘇松水災蠲稅糧戊午京師地震乙丑以水災罷蘇州
織造是年烏斯藏入貢

八年春二月辛未朔日有食之戊子耕藉田戊戌河工
成三月辛亥奉兩宮皇太后如天壽山謁陵免所過田
租甲寅還宮丁卯賜張懋修等進士及第出身有差夏
閏四月庚申廣西八寨賊平冬十月辛丑汰內外冗官

乙巳振蘇松常鎮饑十一月丙子詔度民田是年疏球入貢

九年春正月庚午敕邊臣備警辛未裁諸司冗官癸酉土默特犯錦州遊擊周之望敗沒己卯命翰林官日四入入直辛巳裁南京冗官甲申遼東總兵官李成梁襲敗土默特於鄂蘭圖三月丙寅大閱是月土默特犯遼陽副總兵曹簠禦之敗績夏四月丁酉振山西被災州縣乙卯振蘇松淮鳳徐宿災戶部進萬歷會計錄秋八

月丁未揚州大水九月丁亥停刑冬十月己亥土默特
犯廣寧義州李成梁禦却之十一月丙戌振真定順德
廣平災免稅糧是年裁各省冗官覈徭賦汰諸司冒濫
冗費琉球安南吐魯番天方賽瑪爾堪魯默特哈密烏
斯藏入貢

十年春二月癸巳順義王諱達卒丁酉免天下積年逋
賦三月庚申杭州兵變執巡撫吳善言丁卯以兵部侍
郎張佳允巡撫浙江討定之丙子泰寧衛部長蘇巴爾

噶犯義州李成梁擊斬之己卯倭寇溫州夏四月戊子
朔諭禮部令民及時農桑勿事游惰甲午寧夏土軍馬
景毅叅將許汝繼巡撫都御史晉應槐討誅之庚子以
久旱敕修省五月庚申免先師孔子及宋儒朱熹李侗
羅從彥蔡沈胡安國游酢真德秀劉子翬故大學士楊
榮後裔賦役有差庚辰振畿內饑六月丁亥朔日有食
之壬寅振太原平陽潞安饑乙巳以前禮部尚書潘晟
兼武英殿大學士吏部侍郎余有丁為禮部尚書兼文

淵閣大學士預機務晟尋罷丙午張居正卒秋七月庚
午振平慶延臨鞏饑九月丙辰以皇長子生詔赦天下
甲子上兩宮皇太后徽號冬十月丙申蘇松大水蠲振
有差十二月壬辰大監馮保謫奉御籍其家壬寅復建
言諸臣職是年免畿內山西被災稅糧哈密烏斯藏入
貢

十一年春正月壬戌救嚴邊備閏二月甲子詣達子撤
辰汗襲封順義王緬甸寇永昌乙丑如天壽山謁九陵

免所過田租庚午如西山謁恭讓章皇后景皇帝陵辛
未還宮乙酉振臨鞏平延慶五府旱災免田租三月甲
申追奪張居正官階庚子賜朱國祚等進士及第出身
有差夏四月丁巳張四維以憂去己未以吏部侍郎許
國為禮部尚書兼東閣大學士預機務甲戌承天大雨
江溢是月廣東羅定兵變五月我

大清

祖高皇帝起兵征尼堪外蘭克圖倫城六月乙丑振承

天漢陽鄖陽襄陽災秋八月丙辰免山西被災稅糧九月甲申如天壽山謁陵己丑還宮冬十月癸亥停刑辛未河南水災蠲振有差十一月己卯朔日有食之十二月庚午慈寧宮災敕修省是年琉球入貢

十二年春二月丁卯京師地震己巳釋建文諸臣外親誦成者後裔三月己亥減江西燒造瓷器夏四月乙卯籍張居正家丁巳遊擊將軍劉綎討平隴川賊五月甲午京師地震六月辛亥以雲南用兵免稅糧及逋賦秋

八月丙辰榜張居正罪於天下家屬戍邊九月丙戌奉
兩宮皇太后如天壽山謁陵己丑作壽宮辛卯還宮冬
十月丁巳停刑丙寅免湖廣山東被災稅糧十一月己
丑余有丁卒十二月甲辰以前禮部侍郎王錫爵為禮
部尚書兼文淵閣大學士吏部侍郎王家屏兼東閣大
學士預機務癸亥罷開銀礦是年安南烏斯藏入貢
十三年春正月辛卯四川建武所兵變擊傷總兵沈思
學二月丁未南京地震京師自去年八月不雨至於是

月庚午大雩三月甲申大雩己丑李成梁出塞襲巴圖
魯綽哈大破之壬辰減杭州織造及尚衣監料銀夏四
月丙午大雩戊申以旱詔中外理冤抑釋鳳陽輕犯及
禁錮年久罪宗戊午步禱於南郊面諭大學士等曰天
旱雖由朕不德亦天下有司貪婪剥害小民以致上干
天和今後宜慎選有司蠲天下被災田租一年五月丙
戌雨六月辛丑慈寧宮成壬寅建武所亂卒伏誅是月
四川松茂番作亂秋八月己酉京師地震九月丁丑命

尚寶司少卿徐貞明兼御史領墾田使督治京畿水田
閏九月戊戌振淮鳳災癸卯如天壽山閱壽宮戊申還
宮庚申停刑冬十二月丁卯汰惜薪司內官冗員是月
順義王徹辰汗卒是年吐魯番烏斯藏入貢

十四年春二月癸未嚴外官饋遺三月戊戌以旱蠲諭
廷臣陳時政癸卯禁部曹言事罷治京畿水田癸丑賜
唐文獻等進士及第出身有差戊午久旱敕修省夏四
月癸酉京師地震六月癸未松茂叛番平是夏振直隸

河南陝西及廣西潯柳平樂廣東瓊山等十二縣饑山西盜起秋七月癸卯振江西災戊申敕戶兵二部撫安災民嚴保甲是月淇縣賊王安聚衆流劫尋勦平之九月壬辰王家屏以憂去乙卯停刑己未發帑遣使振河南山東直隸陝西遼東淮鳳災冬十月丙寅禮部主事盧弘春以疏請謹疾杖闕下削籍十一月癸卯祀天於南郊是年吐魯番入貢

十五年春正月壬辰發帑振山西河南山東陝西諸宗

室三月乙卯徹辰汗子徹哩克襲封順義王夏四月京師旱大疫六月戊辰禁廷臣奢僭是月京師大雨振卹貧民秋七月江北蝗江南大水山西陝西河南山東旱河決開封蠲振有差八月庚申以災沴頻仍敕撫按官懲貪吏理冤獄蠲租振卹九月丁亥朔日當食陰雲不見已丑停刑冬十月庚申大學士申時行請發留中章奏十一月戊子鄖陽兵譟巡撫都御史李材罷是年哈密琉球烏斯藏入貢

十六年春三月壬辰詔改景皇帝實錄去邸戾王號不
果行山西陝西河南及南畿浙江並大饑疫夏四月振
江北大名開封諸府饑五月四川建昌番作亂討平之
乙巳以軍儲倉火及各省災傷敕內外官修省六月庚
申京師地震甲子以災傷停減蘇杭織造秋七月乙卯
免山東被災夏稅庚午定邊臣考績法八月乙未詔取
太倉銀二十萬充閩陵賞費九月己未停刑庚申如天
壽山閱壽宮甲子次石景山觀渾河乙丑還宮庚午甘

肅兵變巡撫都御史曹子登罷是月青海部長塔布囊
犯西寧殺副總兵李魁冬十一月辛酉禁章奏浮冗是
年烏斯藏入貢

十七年春正月己酉朔日有食之丁巳太湖宿松賊劉
汝國等作亂安慶指揮陳越討之敗死二月丙申吳淞
指揮陳懋功討平之三月丙辰免陞授官面謝自是臨
御遂簡癸亥雲南永昌兵變乙丑賜焦竑等進士及第
出身有差夏四月南畿浙江江西湖廣大旱己亥王家

屏復入閣始興妖僧李圓朗作亂犯南雄有司討誅之
六月甲申浙江大風海溢己丑永昌亂卒平乙巳南畿
浙江大旱大湖水涸發帑金八十萬振之秋八月壬寅
嚴匿名揭之禁冬十月癸未停刑癸卯黃河決口工成
十二月己丑諭諸臣遇事勿得忿爭求勝是年安南烏
斯藏入貢

十八年春正月甲辰朔召見大學士申時行等於毓德
宮出皇長子見之夏四月甲申振湖廣饑六月己卯免

畿內被災夏稅甲申青海部長浩爾齊犯舊洮州副總兵李聯芳敗沒乙酉更定宗藩事例始聽無爵者得自便秋七月庚子朔日有食之乙丑召見閣臣議邊事命廷臣舉將材己巳命兵部尚書鄭維經略陝西四鎮及山西宣大邊務是月浩爾齊再犯河州臨洮總兵官劉承嗣敗績八月癸酉停徹哩克市賞冬十月戊寅振臨洮被兵軍民十二月甲申遣廷臣九人閱邊是月河套部長布色圖犯永昌總兵官張臣敗之是年安南入貢

十九年春正月緬甸寇永昌騰越二月乙酉總兵官尤繼先敗浩爾齊餘眾於莽拉川閏三月丁丑以彗星見敕修省己卯責給事中御史風聞訕上各奪俸一年夏四月丙申享大廟是後廟祀皆遣代五月壬午四川四哨番作亂巡撫都御史李尚思討平之六月壬子王錫爵歸省秋七月癸未諭廷臣國是紛紜致大臣爭欲乞身此後有肆行誣讟者重治八月丁酉免河南被災田賦九月壬申許國致仕甲戌申時行致仕丁丑以吏部

侍郎趙志昇為禮部尚書前禮部侍郎張位為吏部侍郎並兼東閣大學士預機務冬十月癸巳京營軍官譁於長安門十二月甲午詔定戚臣莊田癸丑河套部犯榆林延綏總兵官杜桐敗之是年畿內蝗南畿浙江大水蠲振有差琉球入貢

二十年春正月丙戌給事中孟養浩以言建儲杖闕下削籍三月戊辰寧夏致仕副總兵巴拜殺巡撫都御史党馨副使石繼芳據城反辛未王家屏致仕壬申命總

督軍務兵部尚書魏學曾討寧夏賊戊寅賜翁正春等進士及第出身有差夏四月甲辰命總兵官李如松提督陝西討賊軍務甲寅甘肅巡撫都御史葉夢熊帥師會魏學曾討賊徹哩克擒賊叩關獻俘復還二年市賞五月倭犯朝鮮陷王京朝鮮王李昖奔義州求救六月丁未諸軍進次寧夏賊誘河套部入犯官軍擊却之秋七月癸酉免陝西逋賦甲戌副總兵祖承訓帥師援朝鮮與倭戰於平壤敗績甲申罷三邊總督魏學曾以葉

夢熊代之尋逮學曾下獄八月乙巳命兵部右侍郎宋應昌經略備倭軍務己酉詔天下督撫舉將材九月壬申寧夏賊平冬十月壬寅以李如松提督薊遼保定山東軍務充防海禦倭總兵官救朝鮮是月振畿內浙江河南被災諸府蠲租有差十一月戊辰御午門受寧夏俘十二月甲午以寧夏賊平告天下是年暹羅吐魯番入貢

二十一年春正月甲戌李如松攻倭於平壤克之辛未

王錫爵還朝辛巳詔並封三皇子為王廷臣力爭尋報
罷壬午李如松進攻王京遇倭於碧蹄館敗績二月甲
寅敕勞東征將士夏四月癸卯倭棄王京遁六月丁酉
詔天下每歲夏月錄囚減釋輕繫如兩京例癸卯倭使
小西飛請款秋七月癸丑召援朝鮮諸邊鎮兵還乙卯
彗星見敕修省八月丙戌以災異敕戒內外諸臣修舉
實政冬十月丙申停刑十二月丙辰命薊遼總督顧養
謙兼理朝鮮事召宋應昌李如松還是年振江北湖廣

河南浙江山東饑河南礦賊大起烏斯藏入貢

二十二年春正月己亥詔以各省災傷山東河南徐淮尤甚盜賊四起有司玩愒朝廷詔令不行自今以安民弭盜為撫按有司黜陟二月癸丑皇長子常洛出閣講學甲子遣使振河南免田租三月癸卯詔修國史夏四月己酉朔日有食之五月辛卯命禮部尚書陳于陞南京禮部尚書沈一貫並兼東閣大學士預機務庚子王錫爵致仕六月己酉雷雨西華門災敕修省秋七月丙

申河套部長布色圖犯延綏是月延綏總兵官麻貴敗
河套部於下馬關冬十月己未以南京兵部右侍郎邢
玠總督川貴軍務討播州宣慰使楊應龍丁卯詔倭使
入朝是月綽哈犯遼東總兵官董一元敗之是年琉球
烏斯藏入貢

二十三年春正月癸卯遣都督僉事李宗城指揮楊方
亨封平秀吉為日本國王三月乙未賜朱之蕃等進士
及第出身有差夏五月丁酉京師地震敕修省秋九月

戊寅青海部長永什卜犯甘肅叅將達雲敗之乙酉詔
復建文年號冬十一月辛未湖廣災蠲振有差十二月
辛丑大學士趙志臯等請發留中章奏不報是年江北
大水淮溢浸泗州祖陵

二十四年春二月戊申麻貴襲河套部敗之三月乙亥
乾清坤寧兩宮災敕修省壬辰下詔自責是月浩爾齊
犯洮河總兵官劉綎破走之夏四月己亥李宗城自倭
營奔還王京五月戊辰河套部犯甘肅總兵官楊濬擊

破之庚午復議封倭命都督僉事楊方亨遊擊沈惟敬
往逮李宗城下獄六月振福建饑秋七月丁卯吏部尚
書孫丕揚請發推補官員章疏不報戊寅仁聖皇太后
崩乙酉始遣中官開礦於畿內未幾河南山東山西浙
江陝西悉令開採以中官領之羣臣屢諫不聽閏八月
乙丑朔日有食之丁卯大學士趙志臯請視朝發章奏
罷採礦不報九月乙未揚方亨至日本平秀吉不受封
復侵朝鮮乙卯葬孝安莊皇后是月河套部犯寧夏總

兵官李如松擊敗之是秋河決黃堦口冬十月丙子停
刑乙酉始命中官榷稅通州是後各省皆設稅使羣臣
屢諫不聽十二月乙亥陳于陞卒

明史卷二十

欽定四庫全書

明史卷二十一

大學士張廷玉等奉 敕修

本紀第二十一

神宗二

二十五年春正月丙辰朝鮮使來請援二月丙寅復議
征倭丙子以前都督同知麻貴為備倭總兵官統南北
諸軍三月乙巳以山東右參政楊鶴為食都御史經略

朝鮮軍務己未以兵部侍郎邢玠為尚書總督薊遼保定軍務經畧禦倭夏六月戊寅皇極中極建極三殿災詔修省癸未罷修國史秋七月癸巳誠諭羣臣丁酉詔赦天下是月播州宣慰使楊應龍叛掠合江綦江八月丁丑倭破朝鮮閑山遂薄南原副總兵楊元棄城走倭逼王京甲申市師地震九月壬辰逮前兵部尚書石星下獄諭死冬十月中戊安南黎惟潭篡立欵闕請罪詔授安南都統使是年琉球入貢

二十六年春正月官軍攻倭於蔚山不克楊鶴麻貴奔
王京三月癸卯賜趙秉忠等進士及第出身有差士子
羣臣詣文華門疏請皇長子冠婚不允夏四月丁卯土
默特犯遼東總兵官李如松出塞遇伏戰死壬申京師
旱救修省六月丁巳楊鶴罷戊午命中官李敬採珠廣
東丙寅張位罷丙子以巡撫天津僉都御史萬世德經
畧朝鮮秋七月丙戌命中官魯保驚雨淮餘鹽八月丁
丑京師地震九月壬辰免浙江被災田租冬十月乙卯

總兵官劉綎麻貴分道擊倭敗之董一元攻倭新寨敗績十一月戊戌倭棄蔚山遁官軍分道進擊十二月總兵官陳璘破倭於乙山朝鮮平是年烏斯藏入貢

二十七年春二月壬子分遣中官領浙江福建廣東市舶司是月貴州巡撫江東之遣兵討楊應龍敗績三月己亥以前兵部侍郎李化龍總督川湖貴州軍務討楊應龍夏四月甲戌御午門受倭俘是月臨清民變焚稅使馬堂署殺其叅隨三十四人閏月丙戌以倭平詔天

下除東征加派田賦己丑以久旱敕修省丙申以諸皇子婚詔取太倉銀二千四百萬兩戶部告匱命嚴覈天下積儲六月己亥楊應龍陷綦江叅將房嘉寵遊擊張良賢戰死秋八月甲午陝西狄道縣山崩九月土默特犯錦州冬十月壬午振京城饑民丙戌以播州用兵加四川湖廣田賦戊子貴州宣慰使安疆臣有罪詔討賊自贖十一月己酉免河南被災田租癸酉振畿輔及鳳陽等處饑十二月丁丑武昌漢陽民變擊傷稅使陳奉

戊子振京師就食流民是年琉球入貢

二十八年春二月戊寅京師地震丙戌李化龍帥師分
八路進討播州六月丁丑克海龍圍楊應龍自縊死播
州平秋七月辛亥旱敕修省甲寅除征播加派田賦八
月辛未慈慶宮成丙子罷朝鮮戍兵九月甲寅停刑是
秋綽哈犯遼東副總兵解生等敗沒冬十月辛未貴州
皮林苗叛總兵官陳璘討之丙子命雲南稅監楊榮開
採阿瓦猛密寶井十二月乙未御午門受播州俘是年

兩畿各省災傷民饑盜起內外羣臣交章請罷礦稅諸
監皆不聽大西洋利瑪竇進方物

二十九年春正月壬子以播州平詔天下蠲四川貴州
湖廣雲南加派田租逋賦除官民誑誤罪是月皮林苗
賊平二月甲戌振大同宣府饑三月乙卯賜張以誠等
進士及第出身有差是月武昌民變殺稅監陳奉之叅
隨六人焚巡撫公署夏四月乙酉徵陳奉還以守備承
天中官杜茂代之五月蘇州民變殺織造中官孫隆之

參隨數人六月京師自去年六月不雨至是月乙亥始
雨山東山西河南皆大旱丁亥法司請熱審不報是夏
振畿內饑秋九月壬寅河決開封歸德丁未趙志皋卒
癸丑振貴州饑戊午以前禮部尚書沈鯉朱賡並兼東
閣大學士預機務冬十月己卯立皇長子常洛為皇太
子封諸子常洵福王常浩瑞王常潤惠王常瀛桂王詔
赦天下壬辰加上慈聖皇太后尊號十二月辛未詔復
朵顏馬市是年琉球入貢

三十年春正月己未以四方災異敕修省二月己卯不
豫召大學士沈一貫於啟祥宮命罷礦稅停織造釋逮
繫復建言諸臣職翼日疾瘳寢前詔甲申重建乾清坤
寧宮閏月丙申復河套諸部貢市戊午河州黃河竭三
月甲申騰越民變殺稅監委官夏四月辛丑振順天永
平饑五月乙亥法司請熱審不報秋七月辛巳邊餉缺
命嚴催積逋是月緬賊陷蠻莫宣撫司宣撫思正奔騰
越賊追至有司殺正以謝賊始解冬十月戊戌振江北

災丙辰停刑是年琉球哈密入貢

三十一年春正月壬午營兩宮三月戊午吏部奏天下
郡守闕員不報是月播州餘賊吳洪等作亂有司討平
之夏四月丁亥朔日有食之五月丙辰閣臣請熱審不
報戊寅京師地震鳳陽大雨雹毀皇陵殿脊是夏河決
蘇家莊北浸豐沛魚臺單縣秋九月甲子江北盜起冬
十月甲申停刑丙申睢州賊楊思敬作亂有司討擒之
十一月甲子獲妖書言帝欲易太子詔五城大索十二

月丙戌召見皇太子於啟祥宮賜手敕慰諭

三十二年春二月壬寅閣臣請補司道郡守及遣巡方御史不報三月甲子乾清宮成乙丑賜楊守勤等進士及第出身有差夏四月辛巳朔日有食之是月濬洳河工成五月癸酉雷火焚長陵明樓六月丙戌以陵災命補闕官恤刑獄丁酉昌平大水壞長泰康昭四陵石梁秋七月庚戌京師大雨壞城垣辛酉振被水居民八月辛丑羣臣伏文華門疏請修舉實政降旨切責丙午分

水河工成九月戊申振畿南六府饑閏月辛丑武昌宗
人蘊鈐等作亂殺巡撫都御史趙可懷冬十月甲寅始
叙平播州功是年琉球烏斯藏入貢

三十三年春正月重修京師外城庚辰伊勒敦達春犯
鎮番總兵官達雲擊敗之夏四月辛亥蘊鈐等伏誅五
月丙申鳳陽大風雨毀陵殿神座庚子雷擊圜丘望燈
高杆六月乙巳以雷警敕修省秋七月戊戌復五路台
吉貢市八月己巳停刑九月甲午昭和殿災丙申京師

地震冬十一月辛巳免淮揚被災田租十二月壬寅詔
罷天下開礦以稅務歸有司歲輸所入之半於內府半
戶工二部丙午免河南被災田租乙卯以皇長孫由校
生詔赦天下開宗室科舉入仕例罷採廣東珠池雲南
寶井

三十四年春二月庚戌以皇孫生加上皇太后徽號辛
亥大學士沈鯉朱賡請補六部大僚不報三月己卯雲
南指揮賀世勲等殺稅監楊榮焚其屍丁酉真定順德

廣平大名災蠲振有差夏四月癸亥濬朱旺口河工成
五月癸酉河套部犯延綏官軍擊走之六月癸卯緬甸
臨木邦副總兵陳寅等不救論罪有差是月畿內大蝗
秋七月癸未沈一貫沈鯉致仕九月甲午詔陝西嚴敕
邊備冬十月丙申停刑十一月己巳朵顏入犯總兵官
姜顯謨禦却之十二月己酉始命考散翰林院庶吉士
壬子南京妖賊劉天緒謀反事覺伏誅是年安南琉球
入貢蒙古喀爾喀諸部悉歸我

大清

三十五年春正月辛未給事中翁憲祥言撫按官解任
宜候命不宜聽其自去不報二月戊戌安南賊武德成
犯雲南總兵官沐睿禦却之三月辛巳賜黃士俊等進
士及第出身有差夏四月戊戌伊勒敦達春犯涼州副
總兵柴國柱擊走之壬子順義王徹哩克卒五月戊子
以前禮部尚書于慎行及禮部侍郎李廷機南京吏部
侍郎葉向高並禮部尚書兼東閣大學士預機務六月

湖廣及徽寧太平嚴州大水閏月辛巳復河套諸部貢
市秋七月庚子京師久雨刑部請發熟審疏不報八月
丙寅振畿內饑九月甲午停刑冬十月癸酉山東旱饑
蠲振有差十一月壬子于慎行卒十二月金沙江蠻鳳
阿克叛陷武定攻圍雲南別陷嵩明祿豐安南賊犯欽
州是年琉球入貢

三十六年春正月河南江北饑二月戊辰京師地震夏
六月乙卯南畿大水秋七月丁酉京師地震郴州礦賊

起八月癸亥治雲南失事諸臣罪巡撫都御史陳用賓
總兵官沐獻下獄論死庚辰振南畿及嘉興湖州饑九
月甲午四川巡撫都御史喬璧星奏擒阿克於東川賊
平冬十一月壬子朱賡卒十二月戊午再振南畿免稅
糧是年琉球入貢

三十七年春三月辛卯恭圖陷大勝堡遊擊于守志戰
於小凌河敗績己酉大學士葉向高請發羣臣相攻諸
疏公論是非以肅人心不報夏四月倭寇溫州秋九月

癸卯左都御史詹沂封印自去丁未停刑是秋福建浙江江西大水湖廣四川河南陝西山西旱畿內山東徐州蝗冬十二月己巳留畿內山東諸省稅銀三分之一振饑民徐州賊殺如臯知縣張藩是年日本入琉球執其國王尚寧哈密入貢

三十八年春三月癸巳賜韓敬等進士及第出身有差夏四月丁丑正陽門樓災辛卯以旱災異常諭羣臣各修職業勿彼此攻訐辛丑振畿內山東山西河南陝西

福建四川饑五月河南賊陳目管等作亂有司討擒之
冬十月辛丑停刑十一月壬寅朔日有食之丁卯以軍
乏餉諭廷臣陳足國長策不得請發內帑是年烏斯藏
入貢

三十九年春二月庚子河套部犯甘州之紅崖青湖官
軍禦却之夏四月京師旱戊子怡神殿災丙申設邊鎮
常平倉五月辛丑雷震正陽門樓壬寅御史徐兆魁疏
劾東林講學諸人陰持計典自是諸臣益相攻訐廣西

廣東大水六月自徐州北至京師大水是夏停熱審冬
十月丁卯戶部尚書趙世卿拜疏自去甲申停刑閣臣
請釋輕犯不報是年暹羅入貢

四十年春二月癸未吏部尚書孫丕揚拜疏自去三月
丙午振京師流民夏四月丙寅南京各道御史言臺省
空虛諸務廢墮上深居二十餘年未嘗一接見大臣天
下將有陸沉之憂不報五月甲午朔日有食之秋八月
河決徐州九月庚戌李廷機拜疏自去冬十月甲申停

刑是年琉球中山王尚寧遣使報歸國

四十一年春正月庚申諭朝鮮練兵防倭三月癸酉賜周延儒等進士及第出身有差加淮揚田賦夏五月己巳諭吏部都察院年來議論混淆朝廷優容不問遂益妄言排陷致大臣疑畏皆欲求去甚傷國體自今仍有結黨亂政者罪不宥六月乙未布色圖襲封順義王秋七月甲子兵部尚書掌都察院事孫瑋拜疏自去九月壬申以吏部左侍郎方從哲前吏部左侍郎吳道南並

禮部尚書兼東閣大學士預機務庚辰吏部尚書趙煥
拜疏自去是年兩畿山東江西河南廣西湖廣遼東大
水烏斯藏入貢

四十二年春正月乙丑總兵官劉綎討建昌叛蠻平之
二月辛卯慈聖皇太后崩己丑振畿內饑三月丙子福
王之國夏四月丙戌以皇太后遺命赦天下六月甲午
葬孝定皇后秋八月甲午禮部右侍郎孫慎行拜疏自
去癸卯葉向高致仕是年安南吐魯番入貢

四十三年春正月乙丑徐州決河工成三月丁未朔日
有食之夏五月己酉薊州男子張差持挺入慈慶宮擊
傷守門內侍下獄丁巳刑部提牢主事王之霖揭言張
差獄情挺擊之案自是起己巳嚴皇城門禁癸酉召見
廷臣於慈寧宮御史劉光復下獄甲戌張差伏誅六月
戊寅久旱敕修省秋七月己酉振畿內饑甲戌停刑閏
八月庚戌重建三殿丁巳山東大旱盜起詔留稅銀振
之丁卯河套諸部犯延綏官軍禦之敗績副總兵孫弘

謨被執冬十月辛酉京師地震十一月戊寅振京師饑
民十二月丙寅再振山東饑

四十四年春三月辛未朔日有食之乙酉賜錢士升等
進士及第出身有差是春畿內山東河南淮徐大饑蠲
振有差夏四月戊午河南盜起諭有司撫勦六月壬寅
河套諸部犯延綏總兵官杜文煥禦却之丁卯河決祥
符朱家口浸陳杞睢柘諸州縣秋七月乙未河套部長
吉納犯高家堡叅將王國興敗沒是月陝西旱江西廣

東水河南淮揚常鎮蝗山東盜賊大起冬十月丁未停
刑十一月己巳隆德殿災

四十五年春二月戊午以去冬無雪入春不雨敕修省
辛未鎮撫司缺官獄囚久繫多死大學士方從哲等以
請不報三月乙亥振江西饑夏五月丙子久旱再諭修
省六月丙申畿南大饑有司請振不報是月閣臣法司
請熱審不報秋七月癸亥朔日有食之丁卯吳道南以
憂去是年雨畿河南山東山西陝西江西湖廣福建廣

東災暹羅烏斯藏入貢

四十六年春二月乙巳振廣東饑夏四月甲辰

大清兵克撫順城千總王命印死之庚戌總兵官張承
允帥師援撫順敗沒閏月庚申以楊鎬為兵部左侍郎
兼右僉都御史經畧遼東六月壬午京師地震是夏有
司請熱審不報秋七月丙午

大清兵克清河堡守將鄒儲賢張旆死之八月壬申開
海運餉遼東庚辰奈曼等七部款塞辛巳停刑壬辰遼

師乏餉有司請發各省稅銀不報九月辛亥加天下田賦乙卯京師地震十一月甲午以災異敕修省十二月丁巳河套部長孟克什勒來降是年吐魯番天方賽瑪爾堪魯默特哈密烏斯藏入貢

四十七年春二月乙丑經畧楊鎬誓師於遼陽總兵官李如柏杜松劉綎馬林分道出塞三月甲申杜松遇

大清兵於吉林崖戰死乙酉馬林兵敗於斐芬山兵備倉事潘宗顏戰死庚寅劉綎兵深入阿布達哩岡戰死

辛丑賜莊際昌等進士及第出身有差夏四月癸酉盛
甲廠災六月丁卯

大清兵克開原馬林敗沒癸酉以大理寺丞熊廷弼為
兵部右侍郎兼右僉都御史經畧遼東甲戌廷臣伏文
華門請發章奏及增兵發餉不報秋八月乙卯山東蝗
癸亥逮楊鎬九月庚辰停刑戊子百官伏闕請視朝行
政不報冬十月丁巳振京師饑民十二月再加天下田
賦辛未鎮江寬奠潁陽新募援兵潰是年暹羅入貢

四十八年春正月庚子朝鮮乞援三月庚寅復加天下
田賦夏四月癸丑皇后王氏崩戊午帝不豫召見方從
哲於弘德殿秋七月壬辰大漸召英國公張惟賢大學
士方從哲尚書周嘉謨李汝華黃嘉善張問達黃克縉
侍郎孫如游於弘德殿勉諸臣勤職丙申崩年五十有
八遺詔罷一切權稅併新增織造諸項九月甲申上尊
謚廟號神宗葬定陵

光宗

光宗崇天契道英睿恭純憲文景武淵仁懿孝貞皇帝
諱常洛神宗長子也母恭妃王氏萬歷十年八月生神
宗御殿受賀告祭郊廟社稷頒詔天下上兩宮徽號未
幾鄭貴妃生子常洵有寵儲位久不定廷臣交章固請
皆不聽二十九年十月乃立為皇太子三十一年獲妖
書言神宗欲易太子指斥鄭貴妃神宗怒捕逮株連者
甚衆最後得皦生光者磔之獄乃解四十一年六月姦
人王日乾上變告孔學等為巫蠱將謀不利於東宮語

連鄭貴妃福王事具葉向高傳四十三年夏五月己酉
薊州男子張差持梃入慈慶宮事復連貴妃內璫太子
請以屬吏獄具戮差於市斃內璫二人於禁中自是遂
有梃擊之案四十八年七月神宗崩丁酉太子遵遺詔
發帑金百萬犒邊盡罷天下礦稅起建言得罪諸臣已
亥再發帑金百萬充邊賞八月丙午朔即皇帝位大赦
天下以明年為泰昌元年蠲直省被災租賦已酉以吏
部侍郎史繼偕南京禮部侍郎沈漉為禮部尚書兼東

閣大學士預機務遼東大旱庚申蘭州黃河清凡三日
甲子以禮部侍郎何宗彥劉一燝韓爌為禮部尚書兼
東閣大學士預機務乙丑以南京禮部尚書朱國祚為
禮部尚書兼東閣大學士預機務召葉向高遣使恤刑
丙寅帝不豫戊辰召對英國公張惟賢大學士方從哲
等十有三人於乾清宮命皇長子出見甲戌大漸復召
從哲等受顧命是日鴻臚寺官李可灼進紅丸九月乙
亥朔崩於乾清宮在位一月年三十有九熹宗即位從

廷臣議改萬歷四十八年八月後為泰昌元年冬十月
上尊謚廟號光宗葬慶陵

贊曰神宗冲齡踐阼江陵秉政綜核名實國勢幾於富
強繼乃因循牽制晏處深宮綱紀廢弛君臣否隔於是
小人好權趨利者馳騫追逐與名節之士為仇讎門戶
紛然角立馴至怙愆邪黨滋蔓在廷正類無深識遠慮
以折其機牙而不勝忿激交相攻訐以致人主蓄疑賢
姦雜用潰敗決裂不可振救故論者謂明之亡實亡於

神宗豈不諒歟光宗潛德久彰海內屬望而嗣服一月
天不假年措施未展三案構爭黨禍益熾可哀也夫

明史卷二十一